

Ogni  
can  
mena  
la coa,  
ogni  
mona  
dise  
la soa

# Discursi da ostarìa

Carta  
canta,  
vilan  
dorme

**Cuotidiano che vien fuora ogni tanto, che scolta, conta e smentisse tuto**

Direzion, redazion, aministrazion, stanparia, vèndia, luogo de nàssita, avvocato, magazin: TUTO DA PESSATI

## El Sindaco ne fà dó...

*L'esperienza e l'età juta*

del MESTRO

Suisin ga el nuovo Sindaco, anzi, el ga oncora quello vecio, ma riconfermà par 'nantri zinke ani dal voto del 6-7 de Giugno passà. Par Walter Barin el xe stà on successo sóo personale e de tuti quili che ga laorà co elo so l'amministrazione passà; on segnale de apprezzamento, ma anca de fiducia pa 'l futuro. Par quello che 'l ga fato el xe stà premià, par quello che 'l farà lo spetemo sol vargo, cussì come che lo spetarà i consiglieri che xe stà eletti de staltre dó liste. A tuti, la redazion ghe augura bon laoro e a noantri se auguremo che el laoro sia par el paese. Par esempio, ghemo visto sfaltare calche stradela e 'desso se domandemo: jèrelò on "servizio" elettorale o ghe xe on piano par tute le strade? I nostri infiltrà in giro par Suisin ne tegnarà informà par tuta la *legislatura*. Al Sindaco, intanto, ghe ricordemo che pi de dó no 'l podarà farne, anca par via de l'età.

Indovina indovinèlo...



CÉREGA E CAVÉJO SBRIZOLA',  
MA CHI XELO QUESTO QUA?

Assè la risposta a l'osto che po' vegnarà estrato chi che ga indovinà. No se vinze gnente. (la soluzione xe sol nùmaro prima).

### PREVISION DEL TENPO

Ga piovesto par tuto l'inverno e in montagna ga nevegà assè. Adesso, però, che xe qua el caldo che no ve vegna in mente de lamentarve, come al solito. A ogni modo noantri a pensemo che ogni tanto piova, che ghe sia temperature alte e che, spece de note, el sole no 'l brusa pi de tanto. Par la tenpesta se vedarà...

a quali filme che se farà e via discorendo. El ga rason, sa pensemo a tute le rogne che 'l se ga tirà drio i ani passà par avere presentà arquanti filme da sbochi. Cussì el ga vu na bela pensada: *me cavo da le pèste* - el ga dito - *e fago on sondàjo*. Dito e fato. Ogni uno el pole scrivare i quattro filme che ghe piase depi sol quadrato chì in parte, e po' retajare el moduleto e darghio a Tomaso. Ghe xe da tegnerse inamente na roba sola: i filme i ga da èssare de quili che se vede poco in television, i ga da èssare bei, de "autore" e no inporta s'ì xe a coluri o in bianco e moro. La comission, cioè Tomaso e Pino, provedarà dopo a lèzare e a decidere. Chi che scrive buelade pagarà na zena a tuta la comission stessa e a na vintena de altri. Solo cussì se vedarà roba che mèrita.

## La Lobi del tavolin quando che 'l telefonin sona

de TOMASO

T e sì lì, sol solito tavolin che te fè i soliti discursi da ostarìa, intavolà co le solite quattro lenguaaze e càpita, parché càpita spesso, senpre pi spesso..., succede che se sente sonare on telefonin, anzi, se sente sonare calcosa, le robe pi stranbe, dal galo che canta a na musicheta ebete o al solito triiinn... del telefono. Insoma, calchedun ciama uno. I quattro, zinke del tavolin ghe mola de ciacolare, parché i ga rispetto de la privaci, e i se mete ...a scoltare quello che dise staltro, quello del telefonin, che no bisogna disturbarlo: "Sito casa stasera? Ghe xelo to marìo...?" Suspance... "...benon, allora femo tuto...". I quattro se varda co l'ocio birbo fin che staltro mete in scarsela l'afare (el telefonin, *n.d.r.*) e i quattro zarvèi taca a masenare. Sì, parché a on discorso cussì - che no bisognava scoltarlo, i jera afari sui, se intende - se pole darghe chissà quante interpretazion. Ma par la lobi de tavolin no ghe xe dubi: l'unica interpretazion la xe proprio quella, caro sior lettore!

## Sondàjo, par la rassegna d'i filme

*Par no catarse a ciapare parole*

A xe za ora de pensare par st'inverno, anca se 'l caldo ga oncora da rivare del tuto e de mezo ghe xe l'Autuno. Cussì, el presidente de la comission che zerne i filme par la rassegna de Novembre el ga za tacà a rognare, che xe ora de darse da fare, che ocore pensare

### NO DESMENTEGARSE CHE...

Entro el 16 de Màjo i "pescatori autonomi" ga da 'vere versà no se sa ben cossa a l'INPS. Allora, xe mèjo ca 'ndè a controllare le vostre carte che se par sbaglio a ve sì desmentegà i ve cata, parché adesso ghe xe i conpiuters-ci-si-vi. Occhèi?

### MODULO PA' I FILME

ME PIASARÍA STI FILME QUA:

- .....
- .....
- .....
- .....

A me ciamo .....

## SPORT - schei e rogne viàja in copia El Real madrid ga Kakà el Milan, invezze, ga smesso

de SILVANO B.



El zugadore brasilian Ricardo Kakà, nato in Brasile el 22 aprile '82. 94 gol in carriera, solo zugando col Milan!

**D**E sta stajon succede senpre: finio el campionato, de solito la squadra de turno che ga robà el scudeto stà chietà, parché i cavài boni no se cambia. Staltre, invezze, le se dà on gran dafàre par darghe aria al grupo e i mete in vèndia i pulieri pi ingalozzi, i fa su schei e i cronpa bestie nuove, magari pi fresche, de sicuro a manco schei. Za, i schei, parché xe de questo che se trata. So ste occasion ghe xe on sfarfujò de miliuni (de euro, se intende) da fare vento come na tenpesta de Lùjo. Xe successo al Milan. Dopo almanco on mese de ciàcole, de robe dite e no dite, el presidente de la squadra rosso-mora el ga deciso de fare cassa e, int'on gesùmaria el ga dà via el mèjo bùò che 'l ghèa in stala: Kakà. Proprio elo, el brasilian col nome de i efeti de na purga, vendù par na brancà de fava ...de oro massicio, calcosa come na sessantena de miliuni (de euro, se intende). E lo ga cronpà el Real Madrid, la squadra de le squadre, che apena che la pole la ne frega ora on zugadore, ora on allenatore (mai on presidente...). A la squadra spagnola ghe auguremo che Kakà diventa ...stítico (de gol, se intende) e al Milan che 'l cata 'nantro che faga gol. Me sa che i milanisti ghe tocarà tore na purga par dijerire tuta la facenda, ili che i jera bituà a Kakà... (continua a pag. 3)

## Musica al Circolo

On Vènare che vien de Sabo...

Ostarìa Pessati, Sabo 4 Lùjo 2009

In smarameo inglese la se ciama "*Jam session*". Dito a la nostrana la saria na serata messa su da tanti sonaduri (musicisti) che sona insieme, dándose el cambio sol palco, ora uno ora staltro, improvvisando, ogni uno col so strumento. Ghe ne xe ùndese in tuto, co chitare varie, bataria, tastiere, trombe... Guai mancare. Par i particolari tegni de ocio i manifesti e el sito del'ostaria. **Se vedemo Sabo 4 Lùjo.**



**On bel luzzo** (*Exos lucius*, in latin). La pora bestia la xe ciapà de mira da tuti i pescaduri senza scrupoli che i ghe fà la tira pa 'l solo gusto de ciarlo e po' métarlo in tecia.


**NATURA** - on virus? Inquinamento? On maniaco sessuale? On serial-chiler? Mah!

## Disastro ecologico sol canale Bisato. Aqua deserta...

Na moria de luzzi sol canale Bisato preoccupa i guardapesca.

dal nostro infiltrà, OSCAR B.

**L**a pulizia provinciale, che la xe quela che se intaressa de caccia, pesca, canài, mäsari e altro del gènare, la xe so le tracce de on assassìn che xe drìo fare stràje de uno d'i pesse pi bei (e pi boni, *n.d.r.*) che sguazza drento a i nostri canài. El luzzo, na bestia che pole diventare longa anca pi de on metro, pesare fin a vintinque chili e magnare tuto quello che se move in aqua, compresi i sculiarini tacà a la bava del pescatore de turno. So l'ambiente se parla parfin de on virus che pare che 'l gàbia deciso de ciapàrsela col pòvaro pesse, ma nissuni ghe crede, parché no se cata luzzi morti in aqua. I xe rivà a pensare anca a on serial-chiler, on pesse pi grosso (siluro?... ) che faga sparire i luzzi (ma no ghe xe prove che el luzzo, che in boca el ga squasi setezzeno denti, (i pi grandi de squasi on centimetro *n.d.r.*), se assa magnare da on siluro. Abandonà anca la strada de l'inquinamento, parché staltre pesse i xe là ch 'i salta e che i nóa senza problemi. Pare, però, secondo na indàjine de l'ISTAT, che so sti ultimi tempi so la zona sia cressù el nùmaro d'i pensionati. *E cossa ghe èntreli i pensionati, pore stele?*, podaria dire calchedun. Ben, i ghe entra. El nostro giornale ga fato na indàjine e xe sta scoperto che insieme co la pension l'ente de Stato ghe regala anca la licenza de pesca a tuti quili che ga passà i sessant'ani; par gnente el se ciama **INPESE!** E cussì, grata grata, a semo vegnù a savere che a Suisin ghe xe uno de quisti, pensionato, sessant'ani fati, che prima de zena, squasi tute le sere el va a fare "on lanceto" sol Bisato, a Mozzèese, e da li el vien casa senpre co on luzzo: bestie de tri quatro chili, longhe da la punta del deo indice a la recia. La pulizia provinciale xe avisà, resta da fàrgio savere anca a i luzzi!



## PAROLE INCROSA'

### IN PIE'

1- Fare come el fuoco che brusa pian. 2 - Come le mule. 3 - Foreta. 4 - Sorze che xola. 5 - Se ghe va col ...cagoto. 6 - Drento a na arnia... 7 - Lo xe una che spéssega. 8 - Amante, mèco. 12 - Costumi. 15 - Erba che ...taca. 21 - Metà ...sale. 23 - Brusóre de stómego. 26 - Ente Nazionale Protezion Animali. 27 - Saco, una sì e una nò. 30 - Taranto. 32 - Stato ...senza cóa. 33 - Fémena. 35 - No ghe piase al can. 36 - El Garavello ...nazionale. 37 - No'l ga magagne. 40 - In mezo al ...giro. 42 - Coto in ...centro.

**COLGA':** 1 - I pesse che manca sol Bisato. 4 - La ponze come na ava. 9 - Mai ...senza cao. 10 - Sol ...mezo de la forma. 11 - Se ghe pestava la ua. 13 - Ela in 'talian. 14 - La fémena che ga scumizià tuto. 16 - Parola senza senso... 17 - Gato ...senza coa. 18 - El "bau" del gato... 19 - A volte el xe osséno. 20 - Sol soffito, na volta. 22 - Aquà, slongà co l'aqua. 24 - Rieti. 25 - Colpa sóa se va su el sindaco! 28 - Elo, a Mozzèese. 29 - Associazione Nazionale Reduci. 30 - Tele Cadore. 31 - La droga de i ani 70. 34 - La porta chi che porta scarogna. 37 - Da staltra parte che dessora. 38 - Campo de ajo. 39 - I se mucia. 41 - El mario de la Desdèmona. 43 - In 'talian se dise "pulire". 44 - On'ora fra le sete e le nove. **(le soluzione a la pag. 3)**